

Lou pount de Coarraze *L. Poque Bouts de la terre n° 30 – 5 mars 1911 70*

E l'abet yamey bist aquet pount de Coarraze,
Bastit sus dus grans rocs, haut e loung à ha pòu ?
Blanc de grame, en braman sous calhaus e la base,
Lou gabe, per debat que pinne coum u hòu.

- Qu'és poden dounc passa, tounba ròus, cars, carrétes,
Chens cragne deu creba ni deu ha tremoula.
N'és pas hèyt de busquets e cordes, ou peyrétes ;
Lou ben que pot bouha, ne-ù hara pas boula.

- Lous Coarrazias, bedét, que soun de bous maynadyes,
Quoan se mesclen u cop de pla ha quauqu'arré,
E qu'aboussen de cap tous lous autes biladyes,
Ço qui b'én qu'at hèn, quoan lou diable seré !

- * Espiat drin aquet pount ! quines comes espèsses !
En éy dounc pla plantat ? E la rée à capsus
Coum u gat esmalit ! Aco n'ey pas peguèsses,
Que tieneré tout Pau, dab lou castèt dessus !

- * Be-n a bis à passa, praube pount, dingu'adare,
Mounde per dessus eth, à-roun aygue debat,
Chens ha ni plus ni mench à d'arrés male care,
Permou que per arré, n'és yamey fatigat !